

Semua pelajar IPT tempatan dapat diskaun 50 peratus

Oleh RASDAN AHMAD

KUALA LUMPUR — Prasarana Malaysia Berhad memberi diskaun sebanyak 50 peratus kepada semua pelajar institut pengajian tinggi (IPT) awam dan swasta tempatan dengan menyediakan kemudahan kad konsesi kepada mereka.

Menteri Pengajian Tinggi, Datuk Seri Idris Jusoh berkata, diskaun 50 peratus ini diberikan ke atas kadar tunai bagi setiap perjalanan yang menggunakan Bas RapidKL, Bas Rapid Transit (BRT), Transit Aliran Ringan (LRT), Monorel dan perkhidmatan Transit Aliran Massa (MRT).

"Permohonan kad terbabit boleh dibuat di kaunter pendaftaran konsesi, Pusat Perhentian Bas Pasar Seni dengan bayaran hanya RM15 sahaja.

"Diharap dengan adanya kemudahan ini, kebergantungan kepada kereta dapat dikurangkan," katanya pada sidang akhbar pada Program Jelajah MRT bersama Menteri Pengajian Tinggi di sini semalam.

Lebih 200 orang mahasiswa universiti, politeknik dan kolej komuniti sekitar Lembah Klang turut serta dalam program anjuran bersama Universiti Putra Malaysia itu bermula dari MRT Tun Razak Exchange (TRX)

hingga ke Stesen Stadium Kajang, Selangor.

Idris berkata, program bersifat 'Rakyat Sentrik' itu memberi peluang kepada mahasiswa untuk merasai infrastruktur bertaraf dunia yang disediakan kerajaan.

"Program ini adalah satu platform untuk menggalakkan mahasiswa menggunakan kemudahan pengangkutan awam.

"Ini kerana negara memiliki pelbagai kemudahan bertaraf dunia seperti MRT, *East Coast Rail Link* serta *High Speed Rail* yang seharusnya dimanfaatkan dengan sebaiknya oleh orang ramai," katanya.



IDRIS (tengah) menyerahkan kad myrapid kepada seorang pelajar IPT, Aida Potri Peli (barisan kedua, empat dari kanan) pada Program Jelajah MRT bersama Menteri Pengajian Tinggi di Stesen MRT Kajang semalam.